

Tortolì, oe est sa Die Mundiale de su Malàidu



In occasione de sa Die Mundiale de su Malàidu, istituida in su 1992 dae Santu Giuanne Pàule II, s'est tzelebrada eris una Missa, presidida dae su Pìscamu Mins. Antonello Mura in sa Crèsia de Santu Giòrgiu, unu momentu de pregadoria e solidariedade, pro chi perunu s'intendat solu in sa maladia.

Su Comunu de Tortolì, in collaboratzione cun s'Unitalsi, sa RSA, sa Cooperativa Piseddu Club e su sustennu de su voluntàriu Fabrizio Murreli comente autista, at organizadu unu servìtziu de trasportu ispetziale dedicadu a is malàidos e a is acumpangiadores issoro. Custu gestu de atenzione at sutaliniadu s'importu de betare is barrieras pro permitere a totus, fintzas a is prus fràgiles, de partetzipare a initiatives comente a custa.

Su tema de sa Die, «Benide a mie, bois totus chi seis istracos e oprimidos, e deo bos apa a donare giovamentu» (Mt 11, 28), at ghiadu sa tzelebratzione comente un'invitu a èssere una comunidade solidale e acolliente, capatza de ofèrrere cunfortu e amparu, siat fisicu siat ispirituale.

“Istade a probe de is prus fràgiles, non ddos faghides intèndere solos, est fondamentale”, at declaradu s'Assessora Irene Murru.